

陳伯玉文集

一

開化圖書館
Kaihua Library

開化圖書館

Kaohua library

開化圖書館

Kaishua library

開化圖書館

Kaishua library

陳伯玉前集五
卷後集五卷附
錄一卷

四部叢刊集部

上海涵芬樓借秀水
王氏二十八宿研齋
藏明刻本景印魚書
板心高營造尺七寸
寬五寸七分

陳伯玉文集序

詩自三百篇而下惟漢魏音
韻風骨猶近於古遠夫兩晉
騷而變胚胎於宋浮靡於
齊梁至於陳隋極熾而雅音
幾乎熄矣有唐之興文運漸
啟雖四傑四友稱美於時然
其流風餘韻漸染既久未能

悉除則天時蜀之射洪人陳
公子昂字伯玉者一旦崛起
西南以高明之見首唱平淡
清雅之音襲騷雅之風力排
雕鏤凡近之氣其學博其才
高其音節冲和其辭旨幽遠
超軼前古盡掃六朝弊習靡
猶砥柱屹立于萬頃頽波之

中陽氣勃起於重泉積陰之
下舊習為之一變萬彙為之
改觀故李太白常蘇州柳
州相繼而起皆踵伯玉之高
風俾後世稱仰嘆慕之不暇
可謂詩人之雄矣其文雖有
六朝唐初氣味然其奏疏數
章亦有用世之志惜其全集

世不多見其詩文見於他集
者亦甚少今巡撫山西都御
史楊公澄與伯玉為同邑人
得其全集於中秘抄錄而來
重復校正命工刊梓以傳共
若干卷嗚呼公之用心厚矣
昔韓文公文起八代之衰名
振當世及五代之末其集亦

開

泯歐陽文忠公得其集於故
簾中求補校正數十年而後
全俾後人尊仰摸範力追古
作而不墜者文忠公之力也
自太白韋柳景慕伯玉作為
古風之流至宋惟朱文公感
興之作風格無異殆今又寥
寥數百年矣我

朝文運大興作者如林會見斯
集之行有能吐辭如伯玉遠
追感唐之作者未必非公振
作之效也嗚呼公之用心其
厚矣哉

弘治四年歲次辛亥重陽日
賜進士嘉議大夫工部右侍郎
前都察院左僉都御史翰林

院備撰

經筵

講官兼

文華殿

講讀官致仕維揚張頤序

開化圖書館

Kaichua library

開化圖書館

印

陳伯玉文集序

昔孔宣父以天縱之才自衛返魯
乃刪詩書述易道而作春秋數千
百年文章粲然可觀者也孔子歿
二百歲而騷人作於是婉麗浮侈
之法行焉漢興二百年賈誼馬遷
為之傑憲章禮樂有老成人之風

長卿子雲之儔瑰詭萬變亦奇特
之士也惜其王公大人之言溺於
流辭而不顧其後班張崔蔡曹劉
潘陸隨波而作雖大雅不足然其
遺風餘烈尚有典刑宋齊已未蓋
顛顛遠遠陵顛流靡至於徐庾天
之將喪斯文也後進之士若上官

開

儀者繼踵而生於是風雅之道掃
地盡矣易曰物不可以終否故受
之以泰道喪五百歲而得陳君君
諱子昂字伯玉蜀人也崛起江漢
虎視函夏卓立千古橫制顛波天
下翕然質文一變非夫岷峨之精
巫廬之靈則何以生此故有諫諍

館

224

之辭則為政之先也昭夷之碣則
議論之當也國殤之文則大雅之
怨也徐君之議則刑禮之中也至
於感激頓挫微顯闡幽度幾見變
化之朕以接乎天人之際者則感
遇之篇存焉觀其逸足騷騷方將
搏扶搖而凌泰清獵遺風而薄嵩

陽伯玉文集卷之二

二

岱吾見其進未見其止惜乎湮厄
當世道不偶時委骨巴山年志俱
天故其文未極也嗚呼聰明精粹
而淪剝貪叨桀鰲以顯榮天乎天
乎吾始未知夫天焉昔常與余有
忘形之契四海之內一人而已良
友歿矣天其喪予合採其遺文可

存焉編而次之凡十卷恨不逢作者不得列於詩人之什悲夫故粗論文之變而為之序至於王霸之才卓犖之行則存之別傳以繼於終篇云耳黃門侍郎盧藏用撰

開

化

kuang zhuang

陳伯玉文前集目錄

第一卷

詩賦

塵尾賦

觀荆玉篇

修竹篇

洛城觀酺應制

度荆門望楚

晚次樂鄉縣

宿空舸峽

與李明府船不相反

感遇詩三十八首

鴛鴦篇

丘禮撫事應制

白帝城懷古

峴山懷古

入峽

宿讓河驛浦

陳伯玉文前集目錄

第二卷

雜詩

荅喬補闕

聞東軍告捷

度峽口山

題贈祀山峰樹

題居延古城

劉丘覽古贈盧居士六首

軒轅臺 燕昭王 樂生 燕太子 晁先生 鄒子

郭隗

初入峽若風

贈趙六二首

荅韓使同在邊

淇門荅宗參軍

萬州放舟乘漲寄親友

贈嚴倉曹乞推命祿

荅洛陽主人

酬暉上人

酬暉上人獨坐山亭

酬李參軍

酬暉上人夏日林泉

酬田逸人

東征答朝廷相送

別舍弟

居延海樹聞鶯

李三書齋

田洗馬游崑崙棹

古意題壁

送別出塞

同宋參軍夢趙六

和陸明府

傷壽安傅少府

詠壁上畫鶴

送賈兵曹入都

送魏大後軍

送殷大入蜀

落第西還別二友

別魏四

送客

春夜別友人二首

別鄉曲故人

送王學士

送梁李二明府

送魏兵曹

別蕭四劉三

送別崔著作

送別陶七

別李參軍

遇崔兵曹使

遇崔冀二使

贈別崔司議冀侍御

送崔著作

獨坐思遠

秋園卧疾

卧疾家園

月夜有懷

三日曲水

登澤州北樓宴

遊暉上人房

登金華觀

群公集畢氏林亭

宴胡楚真禁所

第三卷

表

為人求拜掃表

為人謝贈物表三首

為人陳情表

謝免罪表

慶武成殿表

為人請出家表

賀慈竹再生表

勸追尊中山王表

為達安王獻食表

為程處弼辭流表

為人謝放流表

為人謝罪表

慶皇太子誕表

為人慶拜洛表

和秋景觀競渡詩表

勸封禪表

謝追尊魏國大王表

第四卷

表

為人讓本官表

為人讓官表

為袁卿讓官表

為人謝父官表

為鄭使君讓官表

為武奉御謝表

為人謝兄官表

為人請免官表

為人謝表二首

謝衣表

為建安王破賊表

為人論軍功表

為人謝借馬表

奏白鼠表

為僧謝講表

謝藥表

論突厥表

第五卷

趙氏碑文

封君遺愛碑

續潘尊師碑頌

張君吏人頌德碑

獨孤丞遺愛碑

楊府君碑

故居士陳君碑

陳伯玉文前集目錄終

開化圖書館

Kaichua library

開化圖書館

陳伯玉文後集目錄

第六卷

墓誌銘

陳公墓誌銘

李府君墓誌銘

孫君墓誌銘

張氏墓誌銘

堂弟孜墓誌銘

宇文氏墓誌銘

燕然軍人畫像銘

王府君墓誌

高君墓誌

高府君墓誌銘

高氏墓誌銘

薛氏墓誌銘

陳君碩人銘

冥冥寶冥君古墳記

第七卷

表章文引歌詞狀序

上大周受命表

大周受命神鳳頌

神鳳章
慶雲章

赤華章
此頌章

國殤文

馮牙文

榮海文

弔塞上翁文

祭孫府君文

為建安王祭苗君文

祭黃州府君文

祭韋府君文

祭宇文夫人文

祭率府孫錄事文

春臺引

綵樹歌

山水粉圖

復讎議伏

為人誓衆詞

金門饒東平序

梁王池亭宴序

薛大夫山亭宴序

送中嶽真人序

送崔融等東征序

餞陳少府序缺文

送杜司戶序

冬夜宴序

見牛司倉序

餞齊少府序

餞陶七序

別李參軍序

崔兵曹使讌序

過冀侍御崔司議二使序

別冀侍御崔司議序
鷹鳥詩序

送崔著作序

送麴郎將使默啞序

馬參軍相遇醉歌序

遇姜主簿序

第八卷

雜著

谷制問事八條

請指刑科
明必得賢科

重任刑科
賢不可疑科

指諫勸賞科
請息安宗子兵科

上蜀川安危事三條

上蜀中軍事三條

上益國事一條

上軍國機要事八條

上軍國利害事三條

出使入機
牧宰

上西蕃安危事三條

第九卷

書

諫靈駕入京書

諫雅州討生羗書

諫刑書

諫政理書

諫用刑書

申宗人寬抑書

諫曹仁師出軍書

第十卷

書

為人與遼東書

為人送生口書

為人與諸將書

為人與諸軍州書

荅王尚書書

與韋五靈已書

與岑內史啟

上薛令文章啟

附錄

唐書列傳

陳氏別傳

旌德碑

祭文

過學堂覽文集詩 缺

陳伯玉文後集目錄終

陳伯玉文後集目錄終

燕化圖書館
Kuanhua Library

陳伯玉文集卷之一

新都楊春重編

射洪楊澄校正

詩賦

塵尾賦并序

甲申歲天子在洛陽余始解褐守麟臺正字太子司直宗秦客置酒金谷亭大集賓客酒酣共賦座上食物命余為塵尾賦焉

天之浩浩兮物亦云云性命變化兮如絲之棼或以神好正直天蓋默默或以道惡疆梁天亦茫茫此先都之靈獸固何負而罹殃始居幽山之藪食乎豐草之鄉不

害物而利己每營道而同方何忘情而委代何代情之
不忘卒梁網以見逼受庖割而罹傷豈不以斯尾之有
用而殺身於此堂為君雕俎之羞則君金盤之實承正
人之嘉慶對象起典寶瑟雖信美於茲辰詎同歡於疇
日客有感而嘆者曰命不可思神亦難測吉凶悔吝未
始有極借如昭天道之用莫神於龍受戮為醢不知其凶
王者之瑞莫聖於麟遇害於野不知其仁神既不能自
智聖亦不能自知况林棲而谷走山鹿與野麋古人有
言天地之心其間無巧冥之則順動之則天諒物情之
不異我心又何執於猜矯故曰天之神明與物推移不
為事先動而輒隨是以至人無已聖人不知予欲全身

開

而遠害曾是浩然而順斯

感遇三十八首

微月生西海
幽陽始化昇
圓光正東滿
陰魄已朝凝
太極生天地
三元更廢興
至精諒斯在
三五誰能徵

右一

蘭若生春夏
苒蔚何青青
幽獨空林色
朱蕤冒紫莖
遲遲暎白日
晚嫋嫋
秋風生歲華
盡搖落芳意竟何成

右二

蒼蒼丁零塞
今古緬荒途
亭堠何摧亢
暴骨無全軀
黃沙漠南起
白日隱西隅
漢甲三十萬
曾以事匈奴
但見沙場死
誰憐塞上孤

右三

樂羊為魏將食子殉軍功骨肉且相薄他人安得忠吾
聞中山相乃屬放廢翁狐獸猶不忍况以奉君終

右四

市人矜巧智於道若童蒙傾奪相誇侈不知身所終曷
見玄真子觀世玉壺中窅然遺天地乘化入無窮

右五

吾觀龍變化乃是至陽精石林何冥密幽洞無留行古
之得仙道信與元化并玄感非蒙識誰能測淪冥世人
拘日見酣酒笑丹經崑崙有瑤樹安得采其英

右六

白日每不歸青陽時暮矣茫茫吾何思林卧觀無始衆
芳委時悔鷓鴣鳴悲可鴻荒古已頽誰識巢居子

右七

吾觀崑崙化日月淪洞冥精魄相交樛天壤以羅生仲
尼推太極老聃貴宵冥西方金仙子崇義乃無明空色
皆寂滅緣業亦何名成教信終籍死生俱未停

右八

聖人祕元命懼世亂其真如何嵩公輩誣譎誤時人先
天誠為羨階亂禍誰因長城備胡寇羸禍教其親赤精
既迷漢子年何救秦去去桃李花多言死如麻

右九

深閨觀元群化怫然爭朵頓說說相啖食利害紛疑疑便
便夸毗子榮耀更相持務光讓天下商賈競刀錐已笑
行采芝萬世同一時

右十

吾愛鬼谷子青溪無垢氣囊括經世道遺身在白雲七
雄方龍闔天下亂無君浮雲不足貴遵養晦時文舒之
彌宇宙卷之不盈分豈圖山木壽空與麋鹿群

右十一

呦呦南山鹿罹罟以媒和招搖青桂樹幽蠹亦成科世
情甘近習榮耀紛如何怨憎未相復親愛生禍羅瑤臺
傾巧咲玉盃殞雙蛾誰見枯城蘂青青成斧柯

右十二

林居病時久水木淡孤清閑卧觀物化悠悠念群生青
春始萌遠朱火已滿盈徂落方自此感嘆何時平

右十三

臨岐泣世道天命良悠悠昔日殷王子玉馬遂朝周寶
鼎淪伊穀瑤臺成故丘西山傷遺老東陵有故侯

右十四

貴人難得意賞愛在須臾莫以心如玉探他明月珠昔
稱天挑子今為春市徒鷓鴣悲東國麋鹿泣姑蘇誰見
鷓夷子扁舟去五湖

右十五

聖人去已以公道緬良難蚩蚩夸毗子堯禹以為謾驕
榮貴工巧勢利迭相干燕王尊樂毅鞏國顏同歡魯連
讓齊爵遺組去邯鄲伊人信往矣感激為誰嘆

右十六

幽居觀大運悠悠念羣生終古代興沒豪聖莫能爭三
季淪周赫七雄滅秦嬴復聞赤精子提劍入咸京炎光
既無象晉虜紛蹤橫堯禹道既昧昏霄世方行豈無當
世雄天道與胡兵咄咄安可言時醉而未醒仲尼溺東
魯伯陽遁西溟大運自古來孤人胡嘆哉

右十七

遠迤勢已久骨鯁道斯窮豈無感激者時俗頽此風灌

園何其鄙皎皎於陵子世道不相容嗟嗟張長公

右十八

聖人不利已憂濟在元元黃屋非堯意瑤臺安可論吾
聞西方化清淨道彌敦奈何窮金玉雕刻以為尊雲構
山林盡瑤圖珠翠煩鬼功尚未可人力安能存夸愚道
增累矜智道逾昏

右十九

玄天幽且默羣議曷嗤嗤聖人教猶在世運久陵夷一
繩將何繫憂醉不能持去去行採芝勿為塵所欺

右二十

蜻蛉遊天地與物本無患飛飛未能去黃雀來相干穰

侯富秦寵金石比交歡出入咸陽裏諸侯莫敢言寧知
山東客激怒秦王肝布衣取丞相千載為辛酸

右二十一

微霜知歲晏斧柯始青青况乃金天夕浩露沾群英登
山望宇宙白日已西暝雲海方蕩潏孤鱗安得寧

右二十二

翡翠巢南海雄雌珠樹林何知羨人意嬌愛比黃金殺
身炎州裏委羽王堂陰旖旎光首飾葳蕤爛錦衾豈不
在遐遠虞羅忽見尋多材固為累嗟息此珍禽

右二十三

挈瓶者誰子姣服當青春三五明月滿盈華不自珍高

開

堂委金玉微縷懸千鈞如何負公鼎被歎笑時人

右二十四

玄蟬號白露茲歲已蹉跎群物從大化孤英將奈何瑤
臺有青鳥遠食玉山禾崑崙見玄鳳豈復嘆雲羅

右二十五

荒哉穆天子好與白雲期宮女多怨曠層城閉蛾眉日
眺瑤臺臺一作池樂豈傷飛李時青筍空萎絕白髮生羅帷

右二十六

朝發宜都渚浩然思故鄉故鄉不可見路隔巫山陽巫
山綵雲沒高丘正微茫佇立望已久涕落霑衣裳豈茲
越鄉感憶昔楚襄王朝雲無處所荆國亦淪亡

右二十七

昔日章華宴荆王樂荒淫霓旌翠羽蓋射兕雲夢林竭
來高堂觀悵望雲陽岑雄圖今何在黃雀空哀吟

右二十八

丁亥歲云暮西山事甲兵藪糧匱邛道荷戟驚羗城嚴
冬嵐陰勁窮岫泄雲生昏曠無晝夜羽檄復相驚攀弱
兢萬仞崩危走九冥籍籍峰壑裏哀哀冰雪行聖人御
宇宙聞道泰階平肉食謀何失藜藿緬縱橫

右二十九

竭來豪遊子勢利禍之門如何蘭膏嘆一作歌感激自生
寬衆趨明所避時棄道猶存雲淵既已失羅經與誰論

箕山有高節湘水有清源唯應白鷗鳥可為洗心言

右三十

可憐瑤臺樹灼灼佳人姿碧華映朱實攀折青春時豈
不盛光寵榮君白玉墀但恨紅芳歇彫傷感所思

右三十一

索居獨幾日炎夏忽然衰陽彩皆陰翳親友盡睽違登
山望不見涕泣久漣沔宿昔感顏色若與白雲期馬上
驕豪子驅逐正蚩蚩蜀山與楚水攜手在何時

右三十二

金鼎合還丹世人將見欺飛飛騎羊子胡乃在峨眉變
化固非類芳菲能幾時疲病苦淪世憂悔日侵淄眷然

顧幽褐白雲空涕洟

右三十三

朔風吹海樹蕭條邊已秋亭上誰家子哀哀明月樓自
言幽谷客結髮事遠遊赤丸殺公吏白日轉私讎避仇
至海上被後此邊州故鄉三十里遼東復悠悠每憤胡
兵入常為漢國羞何知七十戰白首未封侯

右三十四

本為貴公子平生實愛才感時思報國拔劍起蒿萊西
馳丁零塞址上單于臺登山見千里懷古心悠悠誰言
未亡禍磨滅成塵埃

右三十五

浩然坐何慕吾蜀有義眉念與楚狂子悠悠白雲期時
我怨不會涕泣久漣洒夢登綏山穴南來巫山芝探元
觀群化遺世從雲螭婉孌將永矣感悟不見之

右三十六

朝入雲中郡北望單于臺胡秦何密邇沙朔氣雄哉籍
籍天驕子猖狂已復來塞垣興名將亭堠空崔嵬嗟
吾何歎邊人塗草萊

右三十七

仲尼探元化幽鴻順陽和大運自盈縮春秋迭來過盲
颺忽號怒萬物相分臍溟海皆震蕩孤鳳其如何

右三十八

觀荆玉篇并序

丙戌歲余從左補闕喬公北征夏四月軍幕次于張
掖河河洲草木無他異者惟有仙人杖往往叢生幽
朔地寒與中國稍異余家世好服食昔嘗餌之及此
後也而息意茲味成人有薦嘉蔬者此物存焉輟爾
而笑曰始者與此君別不圖至是而見之豈非神明
嘉惠欲將扶吾壽也因為喬公昌言其能時東萊王
仲烈亦同旅聞之大喜甘心食之已旬有五日矣適
有行人自謂能知藥者謂喬公曰此白棘也公何謬
哉仲烈愕然而疑亦曰吾恠其味甜今果如此喬公
信是言乃譏余作採玉篇謂宋人不識玉而實珉石

也。余心知必是猶以獨見之故被奪於衆人，乃喟然嘆曰：嗟乎！入之大明者目也，心之至信者口也。夫目照五色，口分五味，玄黃甘苦亦何斷而不惑也？而路傍一議，二子增疑。况君臣之際，朋友之間，自是而觀，則萬物之情可見也。感采玉詠作觀玉篇以答之，并示仲烈，譏其失真也。

鴟夷雙白玉，此玉有淄磷。懸之千金價，舉世莫知真。丹青非異色，輕重有殊倫。勿信工言子，徒悲荆國人。

鴛鴦篇

飛飛鴛鴦鳥，舉翼相蔽翳。俱來涿潭裏，共向白雲涯。音容相眷戀，羽翮兩逶迤。蘋萍戲春渚，霜霰遶寒池。浦沙

連岸淨汀樹拂潭垂年年此遊翫歲歲來追隨鳳凰起
丹穴獨向梧桐枝鴻鴈來紫塞空憶稻梁肥烏啼倦永
夕鶴鳴傷別離豈若此雙禽飛翻不異林刷尾青江浦
交頸紫山岑文章負奇色和鳴多好音聞有鴛鴦綺復
有鴛鴦衾持為美人贈勗此故交心

修竹篇并序

東方公足下文章道弊五百年矣漢魏風骨晉宋莫
傳然而文獻有可徵者僕嘗暇時觀齊梁間詩彩麗
競繁而興寄都絕每以永歎思古人常恐逶迤頽靡
風雅不作以耿耿也一昨於解三處見明公詠孤桐
篇骨氣端翔音情頓挫光英朗練有金石聲遂用洗

心飾視發揮幽鬱不圖正始之音復覩於茲可使建
安作者相視而笑解君云張茂先何敬祖東方生與
其比肩僕亦以為知言也故感歎雅製作脩竹詩一
篇當有知音以傳示之

龍種生南嶽孤翠鬱亭亭峯嶺上崇峯烟雨下微冥夜
聞鼃鼠叫晝聒泉壑聲春風正淡蕩白露已清冷哀響
激金奏密色滋玉英歲寒霜雪苦含彩獨青青豈不戢
凝冽羞比春木榮春木有榮歇此節無凋零始願與金
石終古保堅貞不意伶倫子吹之學鳳鳴遂偶雲籟瑟
張樂奏天庭妙曲方千變簫韶亦九成信蒙雕斲美常
願事仙靈駘馳羣虬駕伊鬱紫鸞笙結交羸臺女吟弄

升天行携手登白日遠遊戲赤城低昂玄鶴舞斷續綵
雲生永隨衆仙去三山遊玉京

奉和皇帝丘禮撫事述懷應制

大君忘自我膺運居紫宸揖讓期明辟謳歌且順人軒
宮帝國盛皇極禮容申南面朝萬國東堂會百神雲陛
旂裳滿天廷玉帛陳鍾石和睿思雷雨被深仁承平信
娛樂王業本艱辛願罷瑤池宴來觀農扈春卑宮昭夏
德尊老睦堯親微臣敢拜手歌舞頌惟新

洛城觀酺應制

聖人信恭已天命允昭回蒼極神功被青雲祕籙開垂
衣受金冊張樂宴瑤臺雲鳳休徵滿龍魚雜戲來崇恩

踰五日惠澤暢三才玉帛群臣醉徽章縟禮該方觀升
中禫言觀拜洛迴徽臣固多幸敢上萬年杯

白帝城懷古

日落滄江晚停橈問士風城臨巴子國臺沒漢王宮荒
服仍周甸深山尚禹功巖懸青壁斷地險碧流通古木
生雲際歸帆出霧中川途去無限客思坐何窮

度荆門望楚

遙去巫峽望望下章臺巴國山川盡荆門烟霧開城
分蒼野外樹斷白雲隈今日狂歌客誰知入楚來

峴山懷古

秣馬臨荒甸登高覽舊都猶悲墮淚碣尚想卧龍圖城

邑遠分楚山川半入吳丘陵徒自出賢聖幾凋枯野樹
蒼烟斷津樓晚氣孤誰知萬里客懷古正踟躕

晚次樂鄉縣

故鄉香無際日暮且孤征川原迷舊國道路入邊城野
戍荒烟斷深山古木平如何此時恨嗷嗷夜猿鳴

入峭峽

峽按嶺相與有奇致焉

蕭徒歌伐木鷺檝漾輕舟靡迤隨波水潺湲沂淺流烟
沙分兩岸露島夾雙洲古樹連雲密交峯入浪浮巖潭
相映媚溪谷屢環周路迥光踰逼山深興轉幽麝鼯寒
思晚猿鳥暮聲秋誓息蘭臺策將從桂樹遊回書謝親
愛十歲覓蓬丘

開
以

宿空舸峽青樹村浦

的的明月水啾啾寒夜猿客思浩方亂洲浦寂無喧憶
作千金子寧知九逝魂虛聞事朱關結綬鷺華軒委別
高堂愛窺覩明主恩今成轉蓬去歎息復何言

宿讓河驛浦

沿流辭北渚結纜宿南洲合岸昏初夕迴塘暗不流卧
聞塞鴻斷坐聽峽猿愁沙浦明如月汀葭晦若秋不及
能鳴鴈徒思海上鷗天河殊未曉滄海信悠悠

入東陽峽與李明府船前後不相及

東巖初解纜南浦遂離群出沒同洲島棲泊異汀濱

作沿泗風烟猶可望歌咲浩難聞路轉青山合峯迴白

日曛犇濤上漫漫積水下沄沄倏忽猶疑及差池復兩
分離離間遠樹藹藹沒遙氛地入巴陵道星連牛斗文
孤狃啼寒月哀鴻叫斷雲仙舟不可見遙思坐氛氲

陳伯玉文集卷之一終

陳伯玉文集卷之二

新都揚春重編
射洪楊澄校正

雜詩六十八首

西還至散關答喬補闕知之

歲稔蒼梧鳳嘹唳白露蟬羽翰本非疋結交獨何全昔
君事胡馬余得奉戎旃携手同沙塞關河緬幽燕芳歲
樂陽止白日屢徂遷功業雲臺薄平生玉珮捐歎此南
歸日猶聞北戍邊代水不可涉巴江亦潺湲攬衣度函
谷銜涕望秦川蜀門自茲始雲山方浩然
還至張掖古城聞東軍告捷贈常五虛已

孟秋首歸路仲月旅邊亭間道蘭山戰相邀在井陘屢
闢關月滿三捷虜雲平漢軍追北地胡騎走南庭君為
幕中士疇昔好言兵白虎鋒應出青龍陣幾成披圖見
丞相按節入咸京寧知玉門道空作隴西行北海朱旄
落東歸白露生縱橫未得意寂寞寡相迎負劍空嘆息
蒼茫登古城

度峽口山贈喬補闕知之王二無競

峽口大漠南橫絕界中國巖石何紛紜小山復翕絕遠
望多衆容逼之無異色崔萃半孤斷透迤屢迴直信關
胡馬衝亦距漢邊塞豈伊河山險將順休明德物壯誠
有衰勢雄良易極邈迤忽而盡決漭平不息之子黃金

軀如何比荒城雲臺盛多士待君丹墀側

題贈祀山烽樹上喬十二侍御

漢庭榮巧宮雲閣薄邊功可憐駉馬使白首為誰雄

題居延古城贈喬十二

聞君東山意宿習紫芝榮滄州今何在華髮旅邊城還
漢功既薄逐胡策未行徒嗟白日暮坐對黃雲生桂枝
芳欲晚蕙葳謗誰明無為空自老含嘆負平生

薊丘覽古贈盧居士藏用六首并序

丁酉歲吾北征出自薊門應觀燕之舊都其城池霸
迹已蕪昧一作沒矣乃慨然仰歎憶昔樂生鄉子群賢
之遊盛矣因登薊樓作六詩以志之寄終南盧居士

亦有軒轅遺迹也

軒轅臺

北登薊丘望求古軒轅臺應龍已不見牧馬生黃埃尚
想廣成子遺迹白雲隈

燕昭王

南登碣石館遙望黃金臺丘陵盡喬木昭王安在哉霸
圖悵已矣駟馬復歸來

樂生

王道已淪昧戰國競貪兵樂生何感激仗義下齊城雄
圖竟中天遺歎寄阿衡

燕太子

秦王日無道太子怨亦深一聞田光義七首贈千金其
事雖不立千載為傷心

田光先生

自古皆有死徇義良獨稀奈何燕太子尚使田光田一作
疑伏劍誠已矣感我涕沾衣

鄒子

大運淪三代天人罕有窺鄒子何寥廓謾說九瀛垂興
已已千載今也則無推

郭隗

逢時獨為貴歷代非無才隗君亦何幸遂起黃金臺

初入峽苦風寄故鄉親友

故鄉今日友歡會坐應同寧知巴峽路草苦石尤風

贈趙六二首

回中烽火入塞上追兵起此時邊朔寒登隴思君子東
顧望漢京南山雲霧裡

赤蟠媚其形婉婁蒼梧泉昔者琅琊子躬耕亦慨然美
人豈遐曠之子乃前賢良辰在何許白日屢頽遭道心
固微密神用無留連舒可彌宇宙攬之不足盈拳蓬蒿以
蕪沒金石徒精堅良寶委短褐閑琴獨嬋娟

答韓使同在邊

漢家失中策胡馬屢南驅聞詔安邊使曾是故人謀廢
書張懷古負劍許良圖出關歲方晏乘障日多虞虜入

白登道烽交紫塞
途連兵屯北地清野
備東胡邊城方
晏閉斥堠始昭蘇
復聞韓長孺
辛苦事匈奴
雨雪顏容
改縱橫才位孤
空懷老臣
未獲趙軍租
但蒙魏侯重
不受謗臣誣
當取金人祭
還歌凱入都

東征至淇門答宋叅軍之問

南星中大火將子涉清淇
西林改微月征旆空自持
碧潭去已遠瑤花折遺誰
若問遼陽戍悠悠天際旗

萬州曉發放舟乘漲還寄蜀中親友

空濛巖雨霽爛熳曉雲歸
嘯旅乘明發犇橈斷磯蒼
茫林岫轉駱驛漲濤飛
遠岸孤雲出遙峯曙日微
前瞻未能响坐望已相依
曲直還今古經過失是非
多岐方

期一作方浩浩征思日駢駢寄謝千金子江海事多遠

贈嚴倉曹乞推命錄

少學縱橫術遊楚復遊燕
栖遑長委命富貴未知天
聞道沉溟客青囊有祕篇
九宮探一作探萬象三筭極重玄
願奉唐生一作將知躍馬年
非曰墨翟問空滯至龍川

答洛陽主人

平主白雲志早愛赤松遊
事親恨未立從官此中州
主人何發問旅客非悠悠
方謂明天子清宴奉良籌
再取連城璧三陟平津侯
不然拂衣去歸從海上鷗
寧隨當代子傾側且沉浮

酬暉上人秋夜山亭有贈

皎皎白林秋微微翠山靜禪居感物變獨坐開軒屏風

泉夜聲絕

聲絕一作聲雜

月露霄光冷多謝忘懷人塵憂未能整

酬暉上人秋夜獨坐山亭有贈

鐘梵經行罷香床坐入禪巖庭交雜樹石瀨瀉鳴泉水

月心方寂雲霞思獨玄寧知人世

舊避諱作代

裏疲病苦攀緣

酬李參軍崇嗣旅館見贈

昨夜銀河畔星文犯遙漢今朝紫氣新物色果逢真言

從天上落乃是地仙人白璧疑寬楚烏裘似入秦摧藏

多古意應覽倍艱辛樂廣雲雖覩夷吾風未春鳳歌空

有問龍性詎能馴寶劍終應出驪珠會見玢未及馮公

老何驚孺子貧青雲儻可致北海憶孫賓

酬暉上人夏日林泉

聞道白雲居窈窕青蓮宇出泉流雜樹石室千年古品

作若泉萬文流林卧對軒窓山陰滿庭户方釋塵勞事

樹石千年古從君饒蘭杜

酬田逸人見尋不遇題居隱里壁

遊人獻書去薄暮返靈臺傳道尋仙友青囊賣卜來聞
鶯忽相訪題鳳久徘徊石髓空盈握金經閉不開還疑
縫掖子復似洛陽才

東征答朝達相送

平生白雲意疲薊媿為雄君王謬殊寵旌節此從戎接
繩當繫虜單馬豈邀功孤劍將何託長謠塞上風

合平津口別舍弟

至東陽步趨不及春
然有懷作以示之

江潭共為客洲浦獨迷津
思積芳庭樹心斷白眉人
同衾成楚越別島類胡秦
林岸隨天轉雲峯逐望新
遙遙終不見默默坐含嚔
念別疑三月經途未一旬
孤舟多逸興誰共爾為鄰

居延海樹聞鶯同作

邊地無芳樹鶯聲忽聽新
間關如有意愁絕若懷人
明妃失漢寵蔡女沒胡塵
坐聞應落淚况憶故園春

李三書齋崇嗣

灼灼青春仲悠悠白日昇
聲容何足恃榮吝坐相矜
願與今庭會將待玉書徵
還丹應有術烟駕共君乘

題田洗馬遊岳桔槔

望遠長為客，高山遂不歸。誰憐比陵客，未息漢陰機。

古意題徐令壁

白雲蒼梧來，氛氳萬里色。問君太平世，舊避諱栖泊靈

臺側

送別出塞

平生聞高義，書劍百夫雄。言登青雲去，非此白頭翁。胡
兵屯塞下，朝寄屬雲中。君為白馬將，腰佩騂角弓。單于
不敢射，天子佇深功。蜀山余方隱，良會何時同。

同叅軍宋之問夢趙六贈靈二子之作

晚霽望崧岳，白雲半出足。氛氳含翠微，宛如羸臺曲。故

人昔所尚幽琴歌斷續變化意無常人琴遂兩亡白雲
失處所夢想變容光疇昔疑緣業儒道兩相妨前期許
幽報迨此尚茫茫晤言既已失感恨情何一始應携手
期雲臺與娥眉連兼濟天下窮獨善其時諸君推管樂
之子慕巢夷柰何蒼生望卒為黃綬欺銘鼎功未立山
林事亦微撫孤一流慟懷舊且睽違盧子尚高節終南
卧松雪宋侯逢聖君駉馭遊青雲而我獨躑躅語默道
猶惜征戍在遼陽蹉跎歲再黃丹丘恨不及白露已蒼
蒼遠聞山陽賦感涕下霑裳

和陸明府贈將軍重出塞

忽聞天上將關塞重橫行始返樓蘭國還向朔方城黃

金裝戰馬白羽集神兵星月開天陣山川列地營晚風
吹盡角春色耀飛旌寧知班定遠獨是一書生

同旻上人傷壽安傳少府

生涯良浩浩天命固惇惇聞道神仙位懷德遂為鄰疇
昔逢堯日衣冠仕漢辰交遊紛若鳳詞翰宛如麟太息
勞黃綬長思謁紫宸金蘭徒有契玉樹已埋塵把臂誰
無託平生固亦親援琴一流涕舊館樂靈巾杳杳泉中
夜悠悠世舊代上春幽明長隔此歌哭為何人

詠主人壁上畫鶴寄喬主簿崔著作

古壁仙人畫丹青尚有文獨舞紛如雪孤飛暖似雲自
矜彩色重寧憶故池羣江海聯翩翼長鳴誰復聞

登薊丘樓送賈兵曹入都

東山宿昔意北征非我心孤負平生願感涕下霑襟暮
登薊樓上永望燕山岑遼海方漫漫胡沙飛且深峨眉
杳如夢仙子曷由尋擊劍起歎息白日忽西沉聞君洛
陽使回子寄南音

送魏大從軍

匈奴猶未滅魏絳復從戎悵別三河道言追六郡雄鷹
山橫代北孤塞一作孤塞接雲中勿使燕然上獨有漢臣功

送殷大入蜀

蜀山金碧地北地饒英靈送君一為別悽斷故鄉情片
雲生極浦斜日隱離亭坐看征騎沒唯見遠山青

落第西蜀別劉酒高明府

別館分周國歸驂入漢京地連函谷塞川接廣陽城望
迥樓臺出途遙烟霧生莫言長落羽貧賤一交情

別魏四慄

轉蓬方不定落羽自驚絃山水一為別歡娛復幾年離
亭暗風雨征路入雲烟還回北山遥一作返歸守東陂田
送客

故人洞庭去楊柳春風生相送河洲晚蒼茫別思盈白
蘋已堪把綠芷復含榮江南多桂樹歸客贈生平

春夜別友人二首

銀燭吐青烟金樽對綺筵離堂思琴瑟別路繞山川明

月隱高樹長河沒曉天悠悠洛陽道此會在何年
紫塞白雲斷青春明月初對此芳樽夜離憂悵有餘清
冷花露滿滴漉簷宇虛懷君欲何贈願上大臣書

遂州南江別鄉曲故人

楚江復為客征棹方悠悠故人憫追送置酒此南州平
生亦何恨夙昔在林丘遠此鄉山別長謠去國愁

送東萊王學士無競

寶劍千金買平生未許人懷君萬里別持贈結交親孤
松宜晚歲衆木愛芳春已矣將何道一作何適無令白髮新

送梁李二明府

負書猶在漢懷策未聞秦復此窮秋日芳樽別故人黃

金裝屢畫白首契逾新空羨雙鳧鳥俱飛向玉輪

送魏兵曹使雋州得登字

陽山涵霧雨之子慎攀登羗竿多珍寶人言有愛憎思
酬明主惠當盡使臣能勿以王陽歎叩道畏峻嶒

江山暫別蕭四劉三旋欣接遇

昨夜滄江別言垂天漢遊寧期此相遇尚接武陵洲結
綬還逢育銜杯且對劉波潭一涵涵臨望樂悠悠山水
丹青雜烟雲紫翠浮終媿神仙友來接野人舟

送別崔著作東征

金天方肅殺白露始專征王師非樂戰之子慎佳兵海
氣侵南部邊風掃北平莫賣靈龍塞婦邀麟閣名

送別陶七 同用風

黃鶴烟雲去青江琴酒同離帆方楚越潯水復西東芙蓉生夏浦楊柳送春風明月相思處應對菊花叢

別李叅軍 索嗣

四十九變化一十三死生翕忽玄黃裏驅馳風雨情是非紛妄作寵辱坐相驚至人獨幽鑒窈窕隨昏明咫尺山河道軒窓日月庭別離焉足問悲樂固能并我輩何為爾栖皇猶未平金臺可攀陟寶界絕將迎戶牖觀天地階基上窅冥自超三界樂安知萬里征中國要荒內人寰宇宙縈絃望如朝夕寧嗟蜀道行

遇荊州崔兵曹使

輜軒鳳凰使林藪鷓鴣冠江湖一相許雲霧坐交歡興
盡崔亭伯言忘釋道安秋光稍欲暮歲物已將闌古樹
蒼烟斷靈庭白露寒瑤琴山水曲今日為君彈

遇崔司議泰之冀侍御珪二使

謝病南山下幽卧不知春使星入東井云是故交親惠
風吹寶瑟微月懷清真憑軒一留醉江海寄情人

贈別崔司議冀侍御

有道君匡國無問余在林白雲峨眉上歲晚來相尋

送崔著作

荆樓望燕國負劍喜茲登清規子方奏單戟我無能仲
冬邊風急雲漢復霜稜慷慨意何道西南恨失朋

南山家園林木交映盛夏五月幽然清涼獨坐

思遠率成十韻

寂寥守窮巷幽獨卧空林松竹生靈白階庭懷古今鬱
蒸炎夏晚棟宇閑清陰軒窓交紫靄簷戶對蒼岑鳳蘊
仙人錄鸞歌素女琴忘機委人代閉牖察天心蛺蝶憐
紅藥蜻蜓愛碧潯坐觀萬象化方見百年侵擾擾將何
息青青長苦吟願随白雲駕龍鶴相招尋

秋園卧疾呈暉上人

幽疾曠日遙林園轉清密疲病澹無豫獨坐泥瑤瑟懷
挾萬古情憂虞百年疾綿綿多滯念忽忽每如失緬想
赤松遊高尋紫庭一作雲逸榮吝始都喪幽人遂貞吉園

書紛滿床山水讀盈室宿昔心所尚平生自茲畢願言
誰見知梵筵有同術八月高秋晚涼風正蕭颯

臥疾家園

世舊代

上無名子人間歲月賒縱橫策已棄寂寞道

為家卧疾誰能問閑居空物華猶憶靈臺友拙真隱大
霞還丹奔日御却老餌雲芽寧知白社客不厭青門瓜

月夜有懷

美人挾趙瑟御月在西軒寂寞夜何以慙慙玉指繁清
光委衾枕遙思屬湘沅空簾隔星漢猶夢感精魂

于長史山池三日曲水

摘蘭籍芳月被宴坐迴汀汎澗清流滿葳蕤白芷生金

絃揮趙瑟玉柱弄秦箏巖榭風光媚郊園春樹平烟花
飛御道羅綺照昆明日落紅塵合車馬亂縱橫

登澤州北樓宴

平生倦遊者觀化久無窮復來登此國臨望與君同坐
見秦兵壘遙聞趙將雄武安軍何在長平事已空且歌
玄雲曲街酒舞薰風勿使青衿子嗟爾白頭翁

夏日遊暉上人房

山水開精舍琴歌列梵筵人疑白樓賞地似竹林禪對
戶池光亂交軒品翠連色空今已寂乘月弄澄泉

春日登金華觀

白玉仙臺古丹丘別望遙山川亂雲日樓榭入烟霄鶴

舞千年樹虹飛百尺橋還逢赤松子天路坐相邀

群公集畢氏林亭

金門有遺世鼎實恣和邗默語誰相識琴樽寄此窓子
年應魏闢漁父愛滄江良時信同此歲晚迹難雙

宴胡楚真禁所

人生固有命天道信無言青蠅一相點白璧遂成冤請
室閑逾邃幽庭草未暄寄謝韓安國何驚獄吏尊

陳伯玉文集卷第二終

陳伯玉文集卷第三

新都楊春重編

射洪楊澄校正

表

為義興公求拜掃表

臣禍豐所鍾早日孤露墳塋莫掃松柏凋荒臣之不天
實有攸咎死罪死罪昔先臣下代遺訓未忘而殃罰不
圖家禍潛構兄弟無故並為參高中冝之言所不可道
孤臣不孝萬死餘責死罪死罪然臣之負謹實陷無辜
吏議不明以投魑魅自泣血去國寄命南荒歷年被病
再以再以生以死以炎山漲海氣瘴窮天戴白之老俗無

再

以

生

死

炎山

漲海

氣瘴

窮天

戴白

之老

俗無

聞者孤臣疲薾豈望頃臯分謂委骨窮溟餌身魚鱉狼
荒之鬼永悲長逝不意慶雲垂澤天渙宥流拂拭霧露
生見白日踴躍昭泰情何以勝死罪死罪而餘殃未泯
凶固荐臻亡兄濟江合家淪溺嫂姪俱逝一不生存尋
途未中臣妻又殞重疊亡歿契闊山川至止之日生意
盡矣誓將守死陵墓沒齒冢園不圖恩幸曲成寵章仍
及題輿別駕職是恩州再造生涯天實為德死罪死罪
臣自歸日淺塋廟未修荆棘荒然祭祀無主今即便祇
皇命遠職邊夷歲月方賒拜掃何日瞻言出涕感貺崩
摧伏惟陛下仁養羣生孝理天下萬物咸遂各得其宜
臣獨向隅有以長戚伏願天慈愷悌憐憫孤窮寬以簡

書之刑賜其告歸之請使得駭奔西土長號北陵獲申
存沒之悲生謁園塋之樹稽顙松闕謝不睦之辜肉袒
山門祈自新之路刻誓肌骨奉以周旋然後退死蠻夷
沉骸糞土甘心朽滅庶無遺恨懍昊天鑒照孤誠可哀
則臣之鯁生志畢今日不勝崩迫之至

為程處弼辭流表

糞土臣某言臣以殃疊姪構凶逆臣合宗族誅戮以顯
國刑不謂天慈哀矜宥從寬典全臣骸骨生竄遐荒窮
魂再造以崩以羅中謝臣聞忠臣事君如子事父窮痛
之至則呼所親何者君父恩深臣子怨切况臣蒙陛下
息遇如子於母今為子不孝為臣不忠長辭闕庭永沒

荒裔悲窮痛恨荼毒誰依即使朽骨埋魂長滅泉壤懇
誠莫展幽翳明恩寔恐隱匿於君不盡臣節明臣臣疑
誅殛瞑目貽殃輒敢隳列肝心罄竭誠懇殘喘冒死期以
少謝伏惟聖母神皇陛下哀憐垂察中謝臣聞犬馬賤
畜尚知主恩草木無心猶感德化臣雖爲猥不足比人
負榮懷恩能無感激臣山東孤賤朝無親故性識愚鈍
材無可堪非能矯跡立方飾行執物假借名譽爲時吹
噓遂得宿衛階墀忝近卽將勤勞莫紀尸素已多任經
十有三年竟無一階外錄臣之駕劣於此可見而貪冒
榮寵尚不知歸陛下應天受圖恢慕大業又不以臣爲
鈍特見褒異擢任中郎委以心膂在職未幾卽檢校將

軍終逾一年又加正授未盈三歲貴顯朝端寵渥隆崇
莫與臣比每刻肌骨晝夜思惟臣以何功謬私天造超
羣越輩顯赫明朝應由天性專愚守一守直行不負物
心不愧神盡忠事君竭力養母所以聖慈幽鑒曲照懇
誠寵任無疑妄同親近不然愚臣何以叨此殊恩臣凶
險罪深母不終養爰初遭疾以至終亡天慈再三降鑒
賜藥酒脯珍膳絰踵臣門優問殷勤若同親戚臣之母
子何德於天子貴母榮恩禮重疊臣誠不孝至頑至戇
蒙此恩榮豈無感戴臣愚性為善不願人知非敢自矜
用為僥倖皇天后土實見赤心臣任即將之日陛下
特以臣貧賜銀及綵臣以天恩非分矜憇賜臣懷戴之

心祈懇冥報遂用於天宮寺寫書造像半為聖人半為
老親臣以君親之恩所宜並報報是當理不合作合疑人
知自尔造成一無知者臣今日獲罪不合上言寔以事
君之心所宜罄盡善惡有隱恐負赤誠恐臣長沒黃泉
無見聖日區區之意安可不陳臣每以陛下恩深微臣
命淺嘗願湮宗滅族獲報萬分何圖誠効未申凶孽先
集逆天反道背德辜恩汚辱門宗虧缺臣節此臣所以
推心泣血仰天號咷長負陛下之恩終無上報之日煩
寬荼毒心肝以糜比者待罪幽囚以殞身碎首為奉陛
下賜書示喻照察臣心所以捧戴偷生假息殘喘今既
蒙寬法兄弟獲全投竄避荒甘禦魑魅臣之慶賴復何

可言所恨亡母弃背即遭此禍几延塗炭孤魂熒熒存
者流離亡者哀痛辛酸幽顯為世作舊代所悲應由臣
不孝不忠延此禍酷何以面目將見先臣何以心願拜
辭天關生死無措永訣於今即以其月日部勒妻子奔
波就道即應死滅結草幽泉伏願聖母神皇陛下至尊
寶神為萬姓加騰天下禔福以祐蒼生壽若南山永永
無極

為宗舍人謝贈物表 三首

草土臣其頓首稽顙臣言今日日中使其至奉宣勅旨
以臣母喪贈物若干以結凶事孤臣鞠凶禮辱天贈稽
顙拜命禱絕迷圖中謝孤臣不天早失父蔭兄弟孤藐

並未成人亡母哀惇鞠育見保不墜于地以及於茲榮
榮私門幽顯為慶榮忝之望非有始圖陛下親親敦心
末屬憫臣孤賤惠降恩休孤門載昌寔始天造母子之
賴以喜以惶競競孤臣未知攸答陛下又恢大運崇號
寵章時復私臣弟兄超登顯位母子光寵榮養以全豐
臣單微官能及此早逝先沒以為親榮而天不禍臣延
集老母號愬無及荼毒煩冤陛下降哀又見憫悼惠賜
禮物過起典章生榮死哀重疊若此孤臣殘喘胡顏冒
德而臣之迷塞荒謬禮經先遠之期又勞駐問有無之
禮憂若家人天實為之臣復何及即此殞絕期以謝恩
號吡崩鯁伏表迷塞不勝荒迫

第二表

草土臣某云云言今日伏奉恩勅以臣亡母初七特降上宮若干人給使黃門若干并賜物若干段以給護齋事天恩過禮伏念號惶孤臣殃豐尚未殞滅荼毒如昨奄將一旬崩號無及肝心糜合陛下慈惻哀念孤窮復憂齋祭恐有關禮既賜束帛支降上宮恩慈再三若猶未足自國之寵貴未聞此榮草茅孤臣何以堪處不日銷滅永負聖恩號泣旻天以崩以愬不勝荒迫之至

第三表

草土臣頓首稽顙言伏奉某月日恩勅以臣亡母遷祔特降勅給人夫及車牛服用物若干以護送靈柩至京

祇奉恩私頓首崩殞臣未亡喊假息苦廬日月永徃奔
及先遠荒迷在疚不知禮儀陛下哀矜憫其不逮恐有
顛沛憂及亡靈備物象設並自天賜祖載塋送又悉官
供威儀在途魂魄光寵行路延佇而以為榮孤臣窮凶
何圖至此天德彌厚殘喘待終泣血扶靈方滅歸路號
感恩造窮絕迷圖不勝號噓戀恩殞絕

為將軍程處弼謝放流表

臣其言臣無教訓家有逆子臣合汚宗滅族以顯國刑
天慈哀矜放從流竄臣為慶賴已是非圖今月遂蒙天
恩以臣所坐流刑特從放釋窮骸枯骨一朝再生踴躍
章惶再崩再殞中謝臣山東孤子朝無親故性識愚魯

非有才能陛下超羣越輩崇以榮寵昔任即將十有三
年遂無涓塵一階昇錄自陛下踐極謬荷恩私冒寵叨
榮超絕時輩從即將檢校將軍總逾一年即加正授皆
從宸眷非有因人寵渥隆崇莫與臣比臣之孤賤榮顯
知慙臣又凶殃積罪甘投魑魅孤負陛下之恩永為遐
荒之鬼肝腦塗地無以微酬豈謂天造曲矜恩及枯骨
收骸溝壑返魄幽泉使魑魅窮魂重生聖日糞土殘命
不滅荒陬荷德戴息萬死無報不勝感荷再生之慶

為人陳情表

臣門衰祚薄少遭險豐行年三歲嚴父早亡慈母鞠育
衰憊相養臣又尪羸少多疾病零丁孤苦僅得成人老

母憫臣孤蒙恕不負荷教誨師氏訓以義方家貧無資
紡績以給束脩衣褐並出母指臣既無姊妹寡有兄弟
衡門獨立唯形與影母子相視惻惻靡依罹此艱虞應
二十歲臣稍以成立忝迹朝班薄祿微資始期色養私
情既獲母子相歡歆罰不圖老母見背攀號何及泣血
漣沛于時日月非宜權殯京兆歲序遷速於今某年臣
本貫河東墳隧無改先人丘壟桑梓猶存亡母客居未
歸舊玉宿草成列拱樹荒涼興言感傷增以崩咽今卜
居宅兆將入舊塋明年吉辰窳是良便除此之際未有
克期臣謬齒王人職在驅役今歲奉使已至居延單行
虜庭絕漠千里臣雖萬死無答鴻恩恐先朝露有負春

知伏惟陛下仁隱自天孝思在物哀臣孤苦降鑒幽冥
使臣來年得營葬具斬草舊域合骨先墳保送羈魂獲
申子道烏鳥之志獲遂私情遺空事畢馳影奔赴雖即
殞歿甘心無憾

為副大總管蘇將軍謝罪表

臣其言伏奉某月日子前赦書赦臣萬死終削見任官
秩還復本將軍名始慶再生即榮寵命宛轉踴躍感戴
慙惶中謝臣聞鑿門受律本合忘生對敵臨戎殉節唯
死此乃國家恒典軍政嚴科臣妄以庸才謬叨重任不
能深圖遠算馘醜權凶以宣廟略之威永息安人之患
屬前軍挫衄士卒奔亡臣後繼驅馳戰鬪交合川谷地

險客主勢殊步馬相懸左右受敵決命爭死力盡塗窮
遂以貔貅之師如於犬羊之衆誠宜刎首謝國殺身報
息陛下洪湯禹之仁務寬大之典愚臣同孟明之侶遂
免嚴誅白骨再榮丹慊未泯誓將枕戈嘗膽殄逆梟凶
躬為士卒之先以雪傷魂之墳肝腦塗地必吞鴻私不
勝荷戴再生榮幸之至

謝免罪表

臣某言月日司刑少卿郭某奉宣勅二日以臣所犯特
從放免伏對恩命魂魄飛揚中謝臣巴蜀微賤名教未
聞陛下降非常之恩加不次之命拔臣草野謬齒衣冠
臣私門祖宗幽顯榮慶豈心微臣一身而已臣宜肅恭

名節上答聖恩不圖誤識凶人坐緣逆黨論臣罪累死
有餘辜肝腦塗地不足塞責陛下私慈育之典寬再宥
之刑矜臣草萊憫臣愚昧特恕萬死賜以再生身首獲
全已是非分官朕具在臣何敢安臣若貪冒寵私覲顏
恩造復塵舊職以玷清猷螻蟻微心實慙面目臣伏見
西有未賓之虜北有逆命之戎尚稽天誅未息邊戍臣
請束身塞上奮命賊庭効一卒之力答再生之施庶陛
下威命綏服荒夷愚臣罪戾時補萬一若臣獲死鋒鏑
為厲犬羊古人結草寔是臣懇願不勝大造再生荷戴之
至

為豐國夫人慶皇太子誕表

臣妾某言本月日伏承軒宮載誕皇嗣克昌品物咸歡
天人交慶臣妾聞聖人多子祝美於堯年螽羽宜孫稱
道乎周頌自非璿圖配永寶祚靈長何以茂對天休光
紹大業伏惟皇太后陛下星虹稜祉月夢延禎餘慶集
於天孫榮光流於帝子玉衣方泰瑤渚增輝某竊寵中
姬承恩外戚塗山之慶既裕於夏臺高祺之詞未陪於
殷薦竊以黃汙之品可享王庭玄鉅之微有芳天獻豈
圖美於豐侈信有厚於由衷敢用擬議蘋蘩精誠菽藿
洗心而薦竊希瑤席之玼潔意而羞以陪金鼎之寶謹
獻食若干輿冒黷玆膳沾汙象筵退用慙惶伏表悚灼
為喬補闕慶武成殿表

臣某言臣以今日奉勅於武成殿與臣入門骨篤祿
等賊請降事臣以愚瞽得踐赤墀對揚天休具奉其狀
天恩特賜臣溫顏又降問云洛陽宮室皆隋朝營制歲
月久遠多有隳頽樓閣內殿凋落者衆補一壞百無可
施功唯此武成確然端立土木丹綵光色如新不知何
故得自如此卿之博識應知其說臣當時造次畧奏其
梗槩退而再省未涉萬分臣恭惟聖言緬求神象研幾
太極幽贊元符上以稽驗神謀旁以合契冥數信有至
道允在於慈臣聞聖人有言曰清明在躬志氣如神嗜
欲將至有開必先降時兩山川出雲此益言神應必
有其物陛下至尊至神為天下主宰御羣品威統百靈

宸居尊嚴品物昭泰自天而祐於是用寧抑臣又聞物
之有靈如人之有神神之和暢則支體便利用人繁昌
則物必豐茂所以見其俗知興廢之數觀其氣識盛衰
之由服物猶然况其大者今陛下應天受命括地登樞
先飛名於祕籙終據圖於寶座今則當千載之運得三
統之元帝氣氤氲祚基於元命皇圖幽藹象顯於天成
夫以德之休明尚榮草木化之昭慶且變烟雲况皇皇
真君龍居其極武成合慶土木增榮獨超衆殿夫何足
恠臣聞敬其事者必載其文美其業者必須其德臣所
恨才非墨妙思乏筆精不能贊揚休祚歌詠聖德臣請
以此事付之史臣千代知神萬載知述伏願天恩特垂

降許

為程處弼慶拜洛表

臣某言臣糞土殘魂合竄荒裔特蒙陛下施再生之德
救萬死之誅起骨九泉同列編戶臣誠萬死無以上答
況恩全賤命生在帝鄉伏見陛下至德配天化及草木
天不愛寶洛出瑞圖地不藏珍河開祕籙陛下恭承天
命因順子來建立明堂式尊顯號成之匪日功若有成
萬國咸歡百靈同慶元正肇祚品物惟新陛下郊祭昊
天總受羣瑞神靈慶戴萬福攸宜斯寔曠古莫聞於今
始見豕飛蠕動莫不歡心臣以糞土窮骸不合輒同朝
賀以古來大禮莫盛於今昔登封泰山七十四主明堂

布政無三教君誠以陛下道冠古今恩溢天地昆蟲草木猶或相歡况臣久蒙驅策今日又拔死為生溝壑殘骸而得再造遂得恭聞大禮側聽鴻名臣伏惟宇宙之中含氣之類蒙恩負德獨臣竄甚向非陛下慈造曲被鴻私臣已灰滅避荒肝塗邊壤豈得尚存骸骨恭聞聖慶臣所以匍匐冒死不避誅戮異申螻蟻之情以同鶯雀之慶然臣自惟罪累不可比人在於禮經尤宜自絕所以屏營冀主不敢先聞今既萬國禮終百神慶畢昆蟲鳥獸亦並歡寧故臣螻蟻之誠始敢昧死上賀臣伏知冒禮違法罪合誅夷臣生見明時預聞嘉慶臣今即殞滅寔萬死為榮不勝歡踴戴賀之誠

為人請子弟出家表

臣某言臣以險豐私門不造亡父故某官先臣某早先
朝露永謝休明日月不居星紀云暮伏以先臣策名委
質冠帶早年始自解巾即陪軒禁終于結綬累忝榮私
三應名卿職參於河海八居州牧任叨於股肱而報効
莫聞零落先及啟足之日露首之慚是以臣克奉詔言
志期冥報請以當家子弟三兩人奉為高宗大帝出家
歸道而孤茆在疚遺屬未申奉以哀號寔貫心髓今者
太帝登仙之忌以及茲辰先臣懇誠未效他日所以乞
遂冥願敢覬天恩庶菩提之因發禪于正覺涅槃之證
幽贊於宸階先臣夙心無恨泉壤伏願上天降鑒微誠

可哀曰緣獲展存沒交慶不勝崩迫云云

為陳御史上奉和秋景觀競渡詩表

臣某言伏見某月日御製秋景務餘聊觀競渡故陳先
作式佇來篇凡六韻天文爰降品彙咸身金簡潛開瑞
圖斯見臣聞白雲興詠漢遊汾水之祠黃竹申歌同舞
瑤池之駕然而志崇遠轍事或勞人故文思之化未光
太清之道被闕伏惟聖母神皇陛下大虹齊聖感月含
神玄德茂於皇階文明照於天下用能提玉斗挹璿衡
百神景從三靈協贊青雲出洛爰開受命之符赤甲榮
河終御輿王之寶非窮神之至德者其孰能與於是哉
既而黃屋務閑紫機時暇洞庭張樂思搜軫於軒遊媯

水披圖想同駮於堯輦然遠而勞物者未若近而安人
動而勤已者豈比靜而泰神於是徒金蹕鳴玉鸞清禁
林御池殿肅波神而戒事命舟子為水嬉彩鷁蓮歌乍
起江吳之引青龍檝柱時搖甌越之風鳥逝虬驚沸珠
潭而競逐雲飛電集橫玉浦而流光信可以娛樂性靈
發揮文物皇歡允洽白日俄光於是奏薰風於管絃詠
叢雲於林籟帝歌爰作天藻攸彰黼帳帷宮縵文房之
綉綵祥雲瑞景霏翰苑之榮光信探道於玄包得斯文
於紫極太平允矣元首康哉方欲朝明堂之宮受群后
之瑞尊崇顯號光啟聖圖封玉嵩丘以接千年之統泥
金少室攸增萬歲之規卓哉煌煌聖君之表也微臣曲

學蓬戶竊位蘭臺未聞駟馬之謠非有雕龍之思鞠躬
霜暑謬覩于天章逖聽鈞臺側聞於帝樂天文尊貴不
遠於下臣帝寶琬崇曲宣於近貴竊以君唱臣和固不
隔於尊卑宮變高後方先諧於金石輒用齊心扣寂假
翰求詞將以攀日月之末光繼螢燭之微照不勝云云

為朝官及岳牧賀慈行再生表

臣等言臣聞天視自我人視天聽自我人聽故堯臣放
命降震怒之災姬聖尊仁受昭事之福先王乃以恭畏
上下祇奉天人於是昭德塞違懲惡勸善所以明枉
直正典刑一昨伏奉恩勅宣示司農卿宗晉卿所奏日
者王德壽等承使失旨靈濫無辜災感蝗蟲毒痛慈行

寧歲為之饑饉吐庶以之流離究魄冥申玄感上測乃
降明制發德音恤淫刑蠲虛典于是幽魂雪憤遺噍昭
蘇枯竹由其再生蝗蟲為之齟青狎蠻動色瘡癘收氣
當天札之凶年致昇平之稔歲非夫聖靈昭感天人合
符何吉凶之徵報同影響天下幸甚臣等聞聖人法天
所以順物小人違道則必亂常故虞祿欽明嚴四凶之
罪魯有仁義正兩觀之誅所以邦家用昌苛慝不作王
某等色厲內荏心僻行堅弄措刑之文為商夷之法以
訟受服同惡自尤意招亟竄之辜允肅政刑之序今者
蒼鷹歛翼乳虎含舌朝廷無腹誹之憂天下有刑措之
頌信可以懲殘創酷誘善旌寬永清悔弄之階共登仁

壽之域臣等謬贊臺閣忝守藩維寔思仰奉大猷以穆
 中典幸屬至聖崇德小人勿用凡在庶品實百恒歡雖
 成康頌聲文景默化刑清政肅曾何足云伏乞書之國
 經頒示天下使四方風動萬國歸仁垂範後昆以為悃
 下疑有 悃誠無任慶抃之至
 脫誤

為赤縣父老勸封禪表

臣聞帝功既又必昭告於上玄元命攸尊必外封於厚
 載故七十四主能恢萬代之規三五六經以為百王之
 典伏惟陛下應天受命握紀登樞包括乾坤之靈壘毒
 神明之化故能開天寶闡地球溫洛所以外圖滎河由
 其薦錄群神既贊衆瑞交馳謳歌於是大歸禮樂以之

深

咸備陛下以順天意允答神休垂顯號以居宸建明堂
而治物百寮惟允萬國咸寧然則嵩岳神宗望玉鑿而
來禪天中仙族佇金駕而崇封寔大禮之昌期膺告成
之茂典况神都為八方之極太室居五嶽之尊陛下垂
統紫微大昌黃連報功崇德允協神心應天順人雜符
靈望皇圖盛業寔在於茲臣等叨願光封久忘帝力竊
聞聖人封禪天下所以會昌山嶽成功皇壽由其配永
臣等既為陛下赤子陛下又為萬姓慈親實願上報天
功下順人望勒成嵩嶽大顯尊名不勝云云

為永昌父老勸追尊中山王表

臣聞子貴親榮聖人典禮故姬文受名尊太王之名漢

祖登宸加上皇之號而皆事美帝籍業盛昌圖臣伏見
中山大王道合先天功成佐命首高祖神堯皇帝義旗
爰建大號初興首贊皇基定策京邑用能神駟電掃應
天順人龍躍紫微光宅區夏實賴大王之德翼成高祖
之勲開國成家猶未奉答况陛下應天受命協運披圖
正顯位於明堂昭大明于天下功崇五帝業盛三皇可
謂寶極洪名尊崇光大今者追尊之義猶闕於顯陵榮
親之典未聞於帝號臣聞商周革命封祀宗之君春秋
正名美虞晉之祀夫以興王繼絕尚不闕於禮經况乎
大孝尊親豈可對於祀典臣等食和白屋沐慶玄門幸
為可封之人叨遇永昌之運伏見陛下則天法地崇孝

陳伯玉

臨人方且示天下以事親正皇猷以達禮蒼生之慶寔
賴惟新不任區區伏請上中山大王尊號遠以光祖宗
之德下以順黎元之望

為百官謝追尊魏國大王表

臣等昨陳愚懇請上魏國大王尊號天慈恩孝降順羣
情宇宙咸歡品物知泰云云臣聞一人有慶萬國歡心
况乎道洽奉先義光尊號伏惟聖母神皇陛下鑿宮受
命寶極披圖以大孝而居尊勤至仁而育物用能光於
四海化及萬方緬惟尊祖之儀寔美前王之典宸心載
穆盛百辟之誠求帝冊終開見千年之盛禮蒼生以之
提福皇極由其永昌凡在含靈孰不歡慶

為建安王獻食表

臣謬籍葭莩叨榮主社元戎出塞違鳳宸而逾年班師
入朝拜鸞閣而有日而策勛飲至頻承湛露之恩獻壽
奉觴未申行潦之薦所以白茅微籍願享於釣臺黃污
菲誠思奉於瑤水謹輒獻食一百舉伏知金鷄瑞鼎盈
上帝之珍羞玉女行厨盡羣仙之品味以茲菲薄有陋
蘋蕡多慙在藻之歡竊有獻芹之志所願皇慈俯納卅
慙獲申天子萬年永慶南山之壽微臣百拜長承北極
之恩無任誠懇之至

陳伯玉文集卷第三終

陳伯玉文集卷第四

新都楊春重編

射洪楊澄校正

表

為李卿讓本官表

臣某言伏奉月日恩勅依舊授臣中大夫守司農卿臣
枯骨再生更蒙寵命魂魄競越不知所圖云云臣寔庸
愚本無名節庇身公族竊軒冕之餘假翼宗枝濫衣冠
之末曰循寵服累應榮班素食之責每深効拙之勤未
補橫被逆賊徐敬真以私讎架禍誣臣云與叔李逸交
通逆豎獄官執法寘以極刑臣嘗領之誅已甘灰粉泉

壤之魄分隔幽冥不圖天地之恩再生枯骨日月之照
曲被幽泉察臣非辜慙臣無罪不牽文法之議特垂赦
宥之慈螻蟻微軀復得全活自非陛下克明克聖至德
至仁臣之魂骸不保今日臣免死為幸豈敢期榮陛下
重加寵章還臣舊職典司宗伯以睦周親愚臣胡顏敢
冒朝典况臣叔孝逸推使未迴在於愚臣更須待罪安
敢私職以玷國章伏乞天恩照臣愚懇不勝感戴生榮
之至云云

為陳舍人讓官表

臣某言伏奉今日詔書以臣為鳳閣舍人榮命自天
寵章非次祇奉惶越顛沛失圖中謝臣以諸生宦不期

達徒以時逢昭泰迹忝周行非有君子瑚璉之材通儒
青紫之秀已得評刑止寺執憲南臺鸚鵡之政無聞駘
馬之榮已極陛下天飛踐祚雲紀命官陽館初開庶政
惟始金章玉式允恃其人如臣疲駑宜所避棄豈圖尚
矜庸劣昭覲欽明任同信臣寵優時革預忝詳於詔獄
叨獎渥於宸階省已循躬實知非分陛下不以榮過其
量職越其才遂欲超絕親賢忝掌樞要司言鳳綵揮翰
龍池愚臣何人敢冒天造臣聞紫機務重青鎖任隆位
匪其人政由有關臣才無經濟識昧典章將何以光贊
帝猷奉揚休命物無異議政允其中臣雖小人必知不
可何況乎君子豈曰能賢伏望妙選時英旁求衆議僉

曰惟兄以弼良圖愚臣懇誠非敢飾讓

為司刑袁卿讓官表

臣某言伏奉某月日勅授臣某官祇拜寵光魂首飛越
中謝臣聞王者敬慎懋在典刑天下允平取茲廷尉苟
非其任法不虛行臣本庸微名術無紀皆緣際會昭遇
盛明謬得揚庭簪徽陪奉鴛鴦綢繆榮祿在尊平時毫
髮之功無聞於官守素飡之責每積於公朝何嘗不悚
迫惟憂夙夜祇畏而天恩方被寵命仍加復蒙聖誥之
榮驟覩銀章之貴永言非據稽首知慙伏惟神皇陛下
恭已受圖任賢興化方其合符皇極代理天工臣亦何
人敢妨賢路伏見某官弱冠登仕早有能名每以清白

洗心不為寒溫變節誠使榮加天寵職察雲司必能利
用文明哀矜庶獄弼成五教無謝於靈臣典載三墳允
諧於周議愚臣暗昧不識大猷請乞以所授官讓與某
官庶使官允其才名不失實聖明有得人之盛愚臣無
冒責之譏實在聖慈鑒非虛謬

為張著作謝父官表

臣某言臣父某守官不謹獲罪自躬犯非清廉法宜不
赦實由臣為子不孝使父陷刑天恩不肅嚴科放全首
領臣得父子相見已是非圖豈謂天澤無涯更垂休命
臣父子兄弟免罪從榮載惶載殞寔慶寔躍中謝臣父
子凡品守道幽微天恩矜憫見垂來錄叨承恩幸廁列

陪臣自侍奉已來於今十有八載雖業藝無紀勞勩不
聞小心恭勤實免愆過明明昊天實昭實察不敢有二
不敢有私夙夜兢兢祇惕若厲所以父母兄弟皆荷恩
私叨職謬官並預供奉摩頂至趾豈足上酬愚臣兢兢
實慙實悚不意臣父衰老恃寵忘公貪潤微財取犯朝
憲應是臣不忠不孝事父無良廉耻不羞讓諫有關遂
使陷於刑法有玷國章臣之萬死無補此責刻肌刻骨
泣血泣天恨負聖恩以媿朝列臣宜代父蒙罪自殞闕
庭不合偷安尚求苟免誠以天波昭洗得更自新所以
忍垢偷生剋躬自勵期効萬一補過酬恩灰軀糜骨以
甘心願伏惟神皇陛下恩同父母矜照懇誠信其赤心

實有整蠲云云

為資州鄭使君讓官表

臣某言伏奉月日制以臣為資州刺史恭承璽命祇拜
寵章匪服知慙循榮如失中謝臣學慙名術才乏器能
而實應逢時金章坐忝題輿佐嶽無展驥之庸剖竹專
城開懸魚之化坐嘯徒積主諾空慙伏惟陛下革命開
基造天立極方且弘宣帝典大啟皇猷而四岳觀風不
虛其任六條班政允屬其才臣疲朽已侵循良久昧將
何式光刺舉允協得人伏願博選英才克諧僉議使人
光理政洽惟良大周之命惟新愚臣之責攸息其所讓
人具如別狀

為武奉御謝表

臣某言伏奉某月日詔書以臣為尚食奉御肅恭休命
祇拜寵章榮慶既崇慙荷交集臣才虧琢玉學昧蠶金
徒以席寵葭莩容光日月叨承雲渥既廣天工而策更
恩昇位非德舉無階而進坐致於青霄有慶方來載光
於朱紱臣聞瑤庭任切攸稱六尚之榮玉食禮尊寔總
八珍之貴臣術慙緣鶴業匪參龍將何致羨瓊芳忒和
金鼎鴻私曲被殊寵降臨天命既不可違聖恩允宜祇
戴循涯揣分實所非圖

為王義暢謝兄官表

臣某言臣兄某前某官特蒙恩詔擢授豫州司馬未及

開

赴任即以某月日改亳州司馬再三策命叨荷恩私在
臣宗門實為慶幸中謝臣兄自解巾從仕三十餘年五
為縣宰三遷州佐政皆通顯職實恭勤直道在公有終
始之節平心應物無造次之憊在於周行頗蒙推薦近
屬虺貞搆逆惑亂豫州註誤平人自貽梟滅陛下憫荆
河之俗遭此無辜弔汝墳之人使其昭慶以為奉揚皇
化者必籍其才撫馭窮人者亦資有德臣兄貞固濫承
天獎遷授豫州在於天恩實為超擢今者未及赴任復
降授亳州重疊承恩翻同貶降朝廷體例實亦為尤臣
兄弟叨榮濫竊非據天慈改授不合冒聞但以始者承
恩蒙越抽擢今有何過遂同左遷區區懇誠輒敢祈訴

天澤伏願皇慈有裕降昭獎之恩臣兄竭忠獲展才之地小臣死日猶生之年

為金吾將軍陳令英請免官表

臣某頓首死罪上言臣聞軍政不減春秋責帥故揚于之亂魏絳致職所以國有明賞下無濫功臣幸以常才文武兼關始年十八投筆從戎西踰流沙東絕蒼海南征北伐無所不至席寵門緒忝迹軒墀屬高宗崇德深仁孝理天下以臣祖父兄弟一門五人皆伏節盡忠身死王事遂超臣不次授原州都督臣時年三十二職兼五印榮絕一時階緣比恩累忝藩翰持節統部前後八州皆居塞垣當賊衝要國之重寄莫與臣比雖無長策

卹戎伏胡恭守朝章保完免失屬陛下大聖矜老容愚
不以臣駑怯更加寵命授以青紫遣督幽州休胡搆凶
王師出討士馬雲集軍務星繁糧饋戈甲動以億計臣
無田疇鄉導之策又之杜預度支之才空竭疲單晝夜
不息以勤補拙首尾三年弥縫闕漏幸無憊乏張玄遇
等不謹師律賊得乘機遂敢長驅燕垂深入趙際臣又
無李牧東胡之畧寔媿吳起西河之守使凶狡收斂遂
擾邊氓論之國憲合刎頸謝罪陛下又不以臣為羣吏
揆清邊軍副大惣管五月恩制六月到軍逆虜天亡臣
又無効至於軍功戰籍叙勲之勞副職日淺未及精覆
大兵旒旆王師獻功而漢庭將軍未聞辭第雲中太守

已論增級令乃竊功謬賞有忝朝章忠誠殉節不昭國
議實由臣濫其職任過其才上不能先副聖心中不能
匡正戎律傍招物議有紊軍容臣罪何逃孰執其咎伏
願乞賜骸骨貶歸私第式清朝序永觀師貞不勝惶懼
○制曰卿出鎮窮塞作牧荆門雖無破陣之功終有捍
城之効且膺巡警未可懸軍

為副大總管屯營大將軍謝表二首

臣聞儼然不恭周王致其大戮將軍失律漢符被其嚴
刑未有逆命驕天而逋壘鼓之罰亡師沮衆遠寬載社
之誅伏惟天冊金輪皇帝陛下肅恭上帝子育群生萬
國所以宅心百蠻由其屈膝而契丹凶狡敢竊邊陲毒

言生靈暴殄天物皇兵順伐仗仁義以共行窮寇毋回
憑險阻而猶闕臣等仁虧聖略智昧詭圖遂以熊羆之
師挫於犬羊之旅誠合結纓軍壘祇罪國章陛下以克
舜深仁且緩三苗之伐禹湯罪己不與萬方之辜遂得
齒劍餘魂更參授鉞之任死綏之魄復同挾纊之恩四
夷義以來蘇三軍感而抃舞痍瘡再起俘馘是圖將士
同心誓雪孟明之恥殤魂共憤思亢杜回之讎臣等殉
義忘心報恩惟死不任感激慶戴云云

謝衣表

臣今日千騎田楷至伏奉恩勅賜臣紫衫旱衫袴等
一副臣萬死骸骨垂朽蒙榮載戰載殞肝心瘞地中謝

臣以鷲朽叨承重任憑奉聖畧誅討元凶竇合震曜天
威倅斬逆首而智力淺短進退無規被王孝傑陷鋒于
前臣則接戰於後躬先士卒苦鬪山林自辰至酉殺賊
無數崑谷峻狹車乘相闐旋被孝傑敗兵回相衝突逆
賊乘便衆散臣軍士卒被傷子將多死臣決命爭首陷
陣摧克日暮兵疲瘡痍相半鳥散山谷人無鬪心臣獨
無依遂失師律即欲刎頸陣下要骨顯誠寔恐身死冠
傷未雪國耻所以含垢忍辱圖死關庭今月六日至幽
州即囚繫獄戶庭到戟魄唯待嚴刑湯鑊在前分妻灰
土豈謂天慈矜鑒回憲增榮以其伏鎖之魂更辱賜衣
之寵煩究踊躍載乾載惶泣血嘗膽誓復國讎刻骨刻

肌敢忘天造不勝已死再生感戴欣躍之至

為建安王破賊表

臣某言今日得遼東都督高仇須等月日破逆賊契
丹孫萬斬等一十一陣露布并捉得生口一百人送至
軍前事三軍慶快不勝踴躍臣聞天之所棄雖暴必亡
人之共讎在遠彌戮况凶羯遺醜未及犬羊固作孽以
招誅自辜恩而取滅伏惟陛下威加四海子育百靈鬼
神尚不敢違山狡豈能逆罪逆賊萬斬等天奪其魄坐
自為殃仇須等謹奉廟謀遠憑國計短兵統接群逆銷
亡返風迴燭薰睛掩目此乃天威潛運神道密周豈止
人謀抑由靈助今盡滅殃病孽罔折朕肌灾兼至凋弊

日滋未加天兵應自糜爛臣訓勵士馬今月尅行大軍
一臨山寇必殄敵俘在即拜關有期預喜承恩思勝慶
賀

為河內王等論軍功表

右金吾衛大將軍兼檢校洛州長史河內郡王臣懿宗
加爵一等勳五轉司賓卿兼羽林大將軍建安郡王攸
宜加爵一等勳七轉臣某等言伏奉月日制書錄臣等
在軍微功特加前件勳封嘉命幸至寵渥載優伏對慙
愧殞首顛越云臣聞古者名將先士卒而後身故其
功勸末世庸將窮人力以寵已故其政乖然則篳路藍
河三軍告辭刑印在手萬夫以離夫與衆共功專已獨

利成敗之理興亡繼焉賞者國之大事故不可忽曰者
林胡搆孽敢解滌陸陛下徵義兵誅不道天下士庶焮
集星馳皆忘身憂國紆禍却難至於躬先矢石血塗草
莽冒艱險應寒溫氣騰青雲精貫白日誠亦勤矣雖則
聖靈威武逆虜自滅然士卒戮力亦盡其勞今大功未
酬衆議猶在而臣等驚怯猥加先封臣等不能折衝虜
虜還師衽席今坐加茅土之賜以先將士之勤使鷓冠
虎臣將何以勸今戰士留滯於外府軍吏咨嗟於下寮
臣等胡顏敢冒天造夫賞一勸百猶恐未孚利一阻萬
其弊誰救爵命不可以招誘國章不可以假人伏願天
光俯迴昭發軍禮請以臣等前件勳封迴受戰亡人及

立功將士等上以明國之大賞下以雪臣等謬功使人
悅亡勞士感知死然後兵可訓勵賊可誅屠此誠國之
元經不可苟而利者臣等不勝區區

為建安王謝借馬表

臣攸宜言伏奉聖慈勅借臣廐馬四疋星旗方列天馬
忽來祇拜息榮林躍兼集臣名慙白馬陣昧青龍徒憑
廟勝之威竊總元戎之首皇師以露凶羯未孚方欲親
負干戈身先士卒金山深入期突厥之功玉壺遂臨叨
得駿之賜昔開東道今見西來感燕骨而長鳴君恩罔
報向朔雲而驤首蹋頤方擒坐馳千里寔愧三軍寵貴
非圖榮多增懼

奏白鼠表

臣某言今日臣等令中道前軍總管王孝傑進軍平
州十九日行次漁陽界晝有白鼠入營孝傑捕得籠送
者身如白雪目似黃金頰目跼伏帖若無氣將士同見
皆謂賊降之徵臣聞鼠者坎精孽胡之象穿竊為盜凶
賊之徒固合穴處野居宵行晝伏今白日歸命素質伏
辜天亡之徵兆寔先露自孝傑發後再有賊中信來不
謀同詞皆云盡滅病死親離衆潰匪朝即夕臣訓兵勵
勇取亂侮亡昔宋剋鮮卑蒼鵝入幕今聖威遠振白鼠
投營休地同符實如靈契凡在將士孰不歡欣執馘獻
俘期在不遠

為僧謝講表

僧某言一昨預內道場講息勅殊獎賜有褒稱死罪死
罪其實專蒙昧于至道徒以早栖真寔委真香緣遂以
濫越殊私光照寵渥日者法宮間道講賜承恩叨玉塵
之榮預金闈之議遂得對揚真會咫尺天威徒有明恩
卒無幽贊不能絕王倪之問以默夸詞息毗耶之言寔
通得意天休光被曲見稱揚羣議允懷猥忘其陋顧揣
涯分寔覩心顏將何翼亮緇徒發揮玄極以念嘉惠怵
惕惟憂載懷愚瞽而心况知愧無任慚荷之至

謝藥表

臣某言伏奉中使宣勅旨賜貧道藥總若干味肅恭休

開

命故受慚惶猥以眇身叨蒙大賴室殊方丈同問疾之
榮施等醫王感能仁之惠雖赭鞭神授未可比其英蕤
赤斧仙圖固以謝其靈氣方將駐茲營魄蠲彼衰痼以
要上品之經將希大年之壽人微惠重答施何階不勝
云

為喬補闕論突厥表

臣某言臣以專蒙叨幸近侍陛下不以臣不肖持勅臣
攝侍御史監護燕然西軍臣自違闕庭應涉秋夏徒居
邊徼無尺寸之功臣識暗劣孤負聖明然臣久在邊隅
夙夜勤灼莫不以蕃事為念俾按察之比以突厥離亂
事跡參驗委曲窮問往來竊有以得其真莫不自為鯨

鯢逾相吞食流離殘餓莫知所歸臣誠愚不識事機然
竊以徃古之變考驗於今乃知天亡凶醜之時陛下收
功之日然臣聞之難得易失者時也易遇難見者機也
聖人所貴者去禍於未萌今陛下體上聖之資開太平
之化匈奴為中國之患自上代所苦久矣合天降其灾
以受陛下萬代之業在於今時臣請以秦漢以來事跡
證明之伏願陛下少留聖聽尋繹省察天下幸甚臣聞
始皇之時併吞六國制有天下按劍叱咤八荒奔馳然
匈奴疆梁威不能服牧馬河內以侵邊疆始皇赫然使
蒙恬將四十萬衆北築長城曰以逐胡取其河南之地
七百余里當時燕齊海岱羸糧給費徭役煩苦人以不

開

堪故長城未畢而閻氏之成已為其患二世而亡莫不
始於事胡也至漢興高祖受命率群雄乘利便以三十
萬衆窘迫白登七日被圍僅而獲免自是歷呂太后至
孝文帝單于傑驚盜陵漢家文帝徒以遜詞致獻金帛
但求其善和而已不敢有圖貢誼所以哭之痛文帝以
天下盛而卑事戎狄以倒懸天下也景帝時邊受其患
于是漢武踐祚以承六代鴻業屬乎文景玄默之化海
內又安太倉之粟紅腐而不可食內庫之錢貫朽而不
可校財力雄富士馬精疆忿匈奴之驕慢將報先帝之
辱遂使王恢韓安國將三十萬衆以馬邑誘單于師出
徒費竟無毫髮之功於是大命六師專以伐胡為務首

尾三十餘年中國騷然大受其弊至于國用不足軍興
不給租及六畜筭及舡車盜賊羣興京師起亂竟不能
制單于之命一日而臣服之漢宗衰殘幾至覆社稷也
故漢武晚年戢兵革之弊乃下哀痛之詔罷輪臺之遊
封丞相為富民侯將以蘇中國也至宣帝代罕復出師
屬匈奴數窮天降其禍虛閭權渠單于病死右賢王屠
耆堂代立骨肉大臣自不相服又立虛閭權渠子為呼
韓祁單于擊殺屠耆堂諸名王貴人各自分立為五單
于更相攻擊以至大亂殘害死者計萬億數畜產耗減
十至八九人以飢餓相燔燒以求食于是寄命無所諸
名王貴人右伊秩訾且渠當戶以下將兵五萬稽首來

降於北方晏然靡有兵革之事直至哀平之際邊人以
安臣竊以此觀匈奴之形察天時之變盛衰存亡之機
事可見也然則匈奴不滅中國未可安卧亦明矣夫以
漢祖之畧武帝之雄謀臣勇將勢盛雷電窮兵黷武傾
天下以事之終不能屈一王服一國宣帝承衰竭之後
撫瘡痍之人不敢惕然有出師之意然而未有遺矢之
費而臣僕於單于之長者其故何哉蓋盛衰有時理亂
有數故曰聖人備備以待時是以正天下如拾遺陛下
肅恭神明德動天地今上帝降匈奴之災孽遺陛下之
良時不以此時順天誅建大業使時過凶虜復興則萬
代為患雖後悔之亦不及矣古語曰天與不取反受其

卧今天意厚矣陛下豈可違之哉臣比在同城接居延
海西逼近淮南口其磧北突厥來入者莫不一一臣所
委察比者歸化首尾相仍携幼扶老已過數萬然而瘡
痍羸瘵皆無人色饑餓道死頗亦相繼先九姓中遭大
旱經今三年矣野皆赤地少有生草以此羊馬死耗十
至七八今所來者皆亦稍能勝致始得渡磧磧路既長
又無好水草羊馬因此重以死盡莫不掘野鼠食草根
或自相食以活嗟命臣具委細問其磧北事皆異口同
辭又耆老云自有九姓來未曾見此飢餓之甚今者同
羅僕固都督早已伏誅為亂之元其自喪滅其餘外小
醜徒侵暴自賊耳本無遠圖多獵菽復自相讎人被塗

炭逆順相半莫知所安回鶻諸部落又與金州橫相屠
戮群生無主號訴嗷嗷臣所以願陛下達大策行遠圖
大定北戎不勞陛下拍揮之間事業可致則千載之後
邊鄙無虞中國之人得安枕而卧豈不在陛下斷哉且
匈奴為中國患非獨秦漢之間巨竊惟先聖時衛公李
靖蓋中國之一老臣徒籍先帝之威用妙勝之策當頡
利可汗全盛之日回機遂便大破虜庭遂繫其侯王裂
其郡縣六十年將于今矣使中國晏然斥堠不警書之
唐史傳之無窮至今天下謂之為神况陛下統先帝之
業履至尊之位醜虜狂悖大亂邊陲皇天遺陛下以鴻
基之時陛下又得復先帝之跡德之大者其何以加若

失此機事以過往使李靖豎子獨成千載之名臣愚竊
為陛下不取也伏見去月日勅令同城權置安北都護
府以招納亡叛振匈奴之喉臣伏慶陛下見幾于萬里
之外得制匈奴之上策臣聞魏嘗言漢光武見事于萬
里之外制敵應變未嘗有遺今陛下超然神鑒遠照寔
所謂聖明之見觀于無形也臣比任同城周觀其地利
又博聞諳知山川者莫不悉備其地東西及北皆是大
磧磧並石鹵水草不生突厥嘗所大入道莫過同城今
居延海澤接張液河中間堪營田處數百千頃水草畜
牧供巨萬又甘州諸屯犬牙相接見所畜粟麥積數十
萬田曰水利種無不收運到同城甚省功費又居延河

開

海多有魚鹽此可謂強兵用武之國也陛下若調選天下精兵采拔名將任以同城都護臣愚料之不用三萬陛下大業不出數年可坐而取成臣比未看國家興兵但循於常軌主將不選士卒不練徒如驅市人以戰耳故臨陣對寇未嘗不先自潰散遂使夷狄乘利輕於國威兵愈出而事愈屈蓋是國家自過計於敵爾故非小醜能有異圖臣竊以為陛下今日不更為之圖以激勵天下忠勇但欲以今日之兵今日之將冀收功於異域建業於中興則臣之愚蒙必以為未可得也陛下即以突厥為萬代之患則臣所言願加察若以夷狄荒服不臣小人非所敢諫臣今監領後軍某等取某月即度磧

去計至某日及劉敬同謹當親按行殫計至比已來地
形及突厥滅亡之勢當審虛實續以聞奏伏願陛下省
臣此章為國大計億萬有一可中者請與三事大夫熟
圖議之此亦萬代一時也伏願少留聖意閑暇念之天
下幸甚陛下採臣芻蕘臣請執受先驅為士卒啟行橫
行匈奴之庭歸報陛下臣死之日庶無遺恨不勝云云

陳伯玉文集卷第四

關化
Ua 2111a

開化圖書館

Kaishua library

開化圖書館

Kaishua library


金

開化圖書館

Kaichua library

開化圖書館

Kaichua library



陳伯玉文集

開元圖書館
Kashima Library

一

開化圖書

Kathua library



Inches 1 2 3 4 5 6 7

Centimetres 1 2 3 4 5 6 7 8 9 10 11 12 13 14 15 16 17

TIFFEN Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color